

Канон святой равноапостольной Марии Магдалине

Празднуем 22 июля (4 августа)

Тропарь, глас 1-й

Христу́, нас ра́ди от Де́вы ро́ждшемуся, честна́я Магдали́на Мари́я последовала еси́, Того́ оправда́ния и зако́ны храня́щи; те́мже днесь всесвяту́ю твою́ па́мьть пра́зднующе, грехо́в разреше́ние моли́твами твои́ми прие́млем. (*Дважды.*)

Слава, и ныне, Богородичен: Гаври́лу веща́вшу Тебе́, Де́во, ра́дуйся, со гла́сом воплоща́шеся всех Влады́ка, в Тебе́, святе́м киво́те, я́коже рече́ пра́ведный Дави́д: яви́лася еси́ ши́ршая небес, поноси́вши Зижди́теля Твоего́. Сла́ва Всельшемуся в Тя, сла́ва Проше́дшему из Тебе́, сла́ва Свобо́дившему нас рождество́м Твои́м.

Канон, глас 8-й

Песнь 1

Ирмос: Во́ду проше́д я́ко су́шу, и египетскаго зла избежа́в, израильтянин вопи́аше: Изба́вителю и Бо́гу на́шему по́йм.

Припев: Свята́я равноапо́стольная Мари́е Магдали́но, моли́ Бо́га о нас.

Божество́нными укра́шена добро́тами, и светоли́тии сия́ющи божество́нными, очере́внее мое́ се́рдце твои́ми моли́твами, Мари́е, озари́.

Свята́я равноапо́стольная Мари́е Магдали́но, моли́ Бо́га о нас.

Освяти́ тя Сло́во Отчее, от духо́в зло́бы изба́вив я́ве, Ему́же учени́ца бы́вши, дарова́ний Свята́го Ду́ха испо́лнилася еси́.

Слава: Вод испо́лнишися живото́рных от исто́чника незави́стнаго, за милосе́рдие на земли́ я́вляшагося Влады́ки, греха́ му́тныя изсуши́ла еси́ то́ки.

И ныне: Ма́терь естество́м Соде́теля по́ем тя, отрокови́це, примири́вшую Бо́гу отпа́дшее естество́ челове́ческое, Богороди́тельнице всенепоро́чная Влады́чице.

Моли́ Бо́га о нас, свята́я равноапо́стольная Мари́е Магдали́но, я́ко мы усе́рдно к тебе́ прибега́ем, ско́рой помо́щнице и моли́твеннице о душа́х на́ших. (*Поклон.*)

Песнь 3

Ирмос: Небеснаго кру́га Верхотво́рче, Го́споди, и Це́ркве Зижди́телю, Ты мене́ утверди́ в любви́ Твое́й, желаний кра́ю, ве́рных утвержде́ние, еди́не Человеколю́бче.

Свята́я равноапо́стольная Мари́е Магдали́но, моли́ Бо́га о нас.

Возлю́бивши пе́рвее благи́х Вино́вника, на́ше благосе́рдно естество́ обожившаго, последовала еси́ Ему́ усе́рдно, Мари́е, Того́ повинув́шися божество́нным велением. (*Дважды.*)

Слава: Рыда́ючи, гроба́ изба́вителева дости́гла еси́, пе́рвее ви́девши божество́нное, отрокови́це, Воскресе́ние. Те́мже благове́стница яви́лася еси́ вопи́ючи: Христо́с воста́, рука́ми воспле́щите.

И ныне: Спасает мя Сло́во вопло́щенное, Пречи́стая, от Твои́х пречи́стых

кровей, Богатством благи, разрешая осуждение первого падения. Егоже непрестанно моли, спасти стадо Твое.

Моли Бога о нас, святая равноапостольная Марие Магдалино, яко мы усердно к тебе прибегаем, скорой помощнице и молитвеннице о душах наших. (Поклон.)

Господи помилуй. (Трижды.)

Седален, глас 8

Обнищавшему Словоу, премногим милосердием, Марие Магдалино, яже яко ученица истинно послужила еси; зрящи же Сего на Кресте вознесена, и во гробе положена, рыдала еси слезящи. Темже Тя почитаем, и твоё совершаем верою торжество, мирносице славная, моли Христа Бога, грехов оставление подати чтущим любовию святую память твою.

Слава, и ныне, Богородичен: Яко Деву и едину в женах, Тя без семени рождшую Бога плотию, вси ублажаем роди человечести, огонь бо вселися в Тя Божества, и яко Младенца млеко питаеши Зиждителя и Господа. Тем ангельский и человеческий род достойно славим пресвятое рождество Твое и согласно вопием Ти: моли Христа Бога согрешений оставление даровати поклоняющимся верою пресвятому Рождеству Твоему.

Песнь 4

Ирмос: Услышах, Господи, смотрения Твоего таинство, разумех дела Твоя, и прославих Твое Божество.

Святая равноапостольная Марие Магдалино, моли Бога о нас.

Без смущения имущи мирскаго суетства мысль, Пришедшему мир весь спасти от лести послужила еси.

Святая равноапостольная Марие Магдалино, моли Бога о нас.

Мыющиеся слезами, гроба живоноснаго достигши, Ангела узрела еси, возвещающая Христова, Марие, Воскресение.

Слава: Сердце твоё непорочное во оправданиях Христовых бысть, и Того единого вожелела еси: краснаго доброю, достославная.

И ныне: Дреманием лености мя сон греховный, Отроковице, постиже: бодренною молитвою Твоею возстави мя к покаянию.

Моли Бога о нас, святая равноапостольная Марие Магдалино, яко мы усердно к тебе прибегаем, скорой помощнице и молитвеннице о душах наших. (Поклон.)

Песнь 5

Ирмос: Вскую мя отринул еси от лица Твоего, Свете незаходимый, и покрыла мя есть чуждая тма, окаяннаго? Но обрати мя, и к свету заповедей Твоих пути моя направи, молюся.

Святая равноапостольная Марие Магдалино, моли Бога о нас.

Прабаба, сию словесы прельстившаго, и изгнавшего от райа древле, зрящи ногами попираема чистых жен, нрав мужеский стяжавших, с ними вечно радуется.

Святая равноапостольная Марие Магдалино, моли Бога о нас.

Умершаго и во гробе затвореннаго, всем жизнь вдыхающаго, уязвляема любовию, сладцей Его любви приношаеши миру, Магдалино, честная Марие, и

слёзныя проливаёши ароматы.

Слава: По страсти Божественней, по страшнем Спасове вознесении, преходиши, слово всюду честное возвещаючи, и многи уловляючи прельщающимися неведением, яко Слова ученица славная.

И ныне: Избавляет мя падшаго к греховным многоплетённым падёжем, Иже из Тебе родитися благоизволивый за безмерную милость, Пресвятая Отроковице. Егоче умоли всякаго вреда избавитися, верою поющим Тя.

Моли Бога о нас, святая равноапостольная Марие Магдалино, яко мы усердно к тебе прибегаем, скорой помощнице и молитвеннице о душах наших. (Поклон.)

Песнь 6

Ирмос: Очисти мя, Спасе, многа бо беззакония моя, и из глубины зол возведи, молюся: к Тебе бо возопих, и услыши мя, Боже спасения моего.

Святая равноапостольная Марие Магдалино, моли Бога о нас.

Глагол твоих орошение, печали вар отъят учеников, честная, якоже возопила еси: Христос воста, живот явися, ясное облистало солнце. (Дважды.)

Слава: Се твоя светозарная память возсия, просвещаючи верныя, в ней поющая тя, и тму отгонящи лукавых бесов искушения, досточудная.

И ныне: Священства мысленное и неприкосновенное очистилище, свещник световиден явилася еси, и мост к Богу преводяй, исповедающим Тя Богородицу, Пренепорочная.

Моли Бога о нас, святая равноапостольная Марие Магдалино, яко мы усердно к тебе прибегаем, скорой помощнице и молитвеннице о душах наших. (Поклон.)

Господи помилуй. (Трижды.) Слава, и ныне.

Кондак, глас 3

Предстоящи преславная у Креста Спасова со иными многими, и Матери Господни состраждущи, и слезы точащи, сие в похвалу приношаше, глаголющи: что сие есть странное чудо, Содержай всю тварь, пострадати изволи? Слава державе Твоей.

Икос

Владыка Христос и Царь создания, не оставль небеса, сниде, якоже изволи, и плоть тленную восприят волею. Егоче видевши Мати непорочная на Кресте пригвождаема, с девами честными предстоящи, и Магдалина Мария плачущи. Той бо тамо сущей, и теплейшую веру показующей, присно последоваше Христу, и гроб зряше, ожидаючи и вопиючи: пострадати изволил еси, слава державе Твоей.

Песнь 7

Ирмос: Отроцы еврейстии в пещи попраша пламень дерзновенно, и на росу огонь преложиша вопиюще: благословен еси, Господи Боже, во веки.

Святая равноапостольная Марие Магдалино, моли Бога о нас.

Недуги отгнала еси различныя, споспешествующаго Тебе Слова имущи, Емуже предстоиши ныне, вопиючи, мирносице: благословен еси, Господи Боже, во веки. (Дважды.)

Слава: Еди́на ви́дела еси́ пре́жде ине́х, Живота́ на́шего, Христа́, воста́вша, вертогра́даря же Того́ нещевáла еси́, вопию́щи: благослове́н еси́, Го́споди Бо́же, во ве́ки.

И ныне: Уста́вила еси́ тече́ние сме́ртное, безсме́ртнаго Бо́га я́ко заче́нши, и ро́ждши, Чи́стая, Ему́же вси по́йм: благослове́н еси́, Го́споди Бо́же, во ве́ки

Моли́ Бо́га о нас, свята́я равноапо́стольная Мари́е Магдали́но, я́ко мы усе́рдно к тебе́ прибега́ем, ско́рой помо́щнице и моли́твеннице о душа́х на́ших. (Поклон.)

Песнь 8

Ирмос: Седмери́цею пещь халде́йский мучи́тель богочести́вым неистовно разжже́, си́лою же лу́чшею спасе́ны, сия́ ви́дев, Творцу́ и Иза́вителю вопия́ше: о́троцы, благослови́те, священни́цы, воспойте, лю́дие, превозноси́те во вся ве́ки.

Свята́я равноапо́стольная Мари́е Магдали́но, моли́ Бо́га о нас.

Све́тло яви́ся жити́е твоё, заря́ми облистá, о Магдали́но, добродете́льных дея́ний, божестве́ннаго пропове́дания, е́же к Бо́жию манове́нию, и лучáми я́же к Зижди́телю любве́, Ему́же поёши со Ангелы: священни́цы, пойте, лю́дие превозноси́те Его́ во ве́ки. (Дважды.)

Слава: У Креста́ предстоя́ла еси́, зря́щи непра́ведное, сла́вная, заколе́ние, Себе́ изливша́го за неизрече́нную ми́лость, и стенáнии и слезáми облива́ема, что страна́ное, вопия́ла еси́, Мари́е, чу́до? Ка́ко умерщвля́ется и умира́ет смерть умертви́вый, Живо́т сый естество́м.

И ныне: Я́ко Бо́жию Ма́терь Тя еди́номудренно сла́вим, и тва́ри вы́шшую, Чи́стая, о Тебе́ бо осужде́ние е́же от Ада́ма потреби́ся, и отсту́пльшее присво́ися челове́ков существо́, пою́щее: священни́цы, благослови́те, лю́дие, превозноси́те Его́ во ве́ки.

Моли́ Бо́га о нас, свята́я равноапо́стольная Мари́е Магдали́но, я́ко мы усе́рдно к тебе́ прибега́ем, ско́рой помо́щнице и моли́твеннице о душа́х на́ших. (Поклон.)

Песнь 9

Ирмос: Ужасе́ся о сем не́бо, и земли́ удиви́шася концы́, я́ко Бог яви́ся челове́ком плóтски и чре́во Твоё бысть пространне́йшее небес. Тем Тя, Богороди́цу, Ангелов и челове́к чинонача́лия велича́ют.

Свята́я равноапо́стольная Мари́е Магдали́но, моли́ Бо́га о нас.

К божестве́нной преложи́лася еси́ ны́не ра́дости, к райстей широте́ пространней, к мы́сленным и премирным оби́телем, иде́же преподо́бных чи́нове; иде́же есть глас чист све́тло пра́зднующих, Мари́е богонóсная. Те́мже Тя вси ублажа́ем.

Свята́я равноапо́стольная Мари́е Магдали́но, моли́ Бо́га о нас.

Ничто́же предпочла́ еси́ су́щих на земли́ па́че любве́ Христа́ Бо́га, но Того́ еди́наго снеда́ема добрóтами, и непосредственно, всечестна́я, посыла́емыми лучáми, стопа́м Сего́, вопия́ла еси́, последу́ючи: Тя велича́ю, Многоми́лостиве.

Слава: Обоже́ние получи́вши боготворное, и пото́ка напíвшия благода́ти, и мзды боле́зней прие́мши богонача́льно, и апо́стольским чи́ном счита́ема, Магдали́но, учени́ца Сло́ва, любóвию чту́щия Тя Тво́ими моли́твами сохрани́.

И ныне: Я́ко Ма́ти пострада́вшаго за ны, душе́тленных страсте́й мя изба́ви; я́ко ми́лостива, разреши́ согреше́ний мо́их плени́цы; я́ко бла́га, ублажи́ ны́не

озлобленную мою душу бесовскими искушениями, Дево Богородице, да пою Тя всепетую.

Моли Бога о нас, святая равноапостольная Марие Магдалино, яко мы усердно к тебе прибегаем, скорой помощнице и молитвеннице о душах наших. (Поклон.)

Тропарь, глас 1-й

Христу, нас ради от Девы рождшемуся, честная Магдалина Мария последовала еси, Того оправдания и законы хранящи; темже днесь всесвятую твою память празднующе, грехов разрешение молитвами твоими приедем.

Кондак, глас 3-й

Слава: Предстоящи преславная у Креста Спасова, со иными многими, и Матери Господни состраждущи, и слезы точащи, сие в похвалу приношаше, глаголющи: что сие есть странное чудо, Содержай всю тварь, пострадади изволи? Слава державе Твоей.

И ныне, Богородичен: Тя ходатайствовавшую спасение рода нашего, воспеваем, Богородице Дево, плотию бо от Тебе восприятою Сын Твой и Бог наш, Крестом восприим страсть, избави нас от тли, яко человеколюбец.

Молитва 1 (Из Акафиста)

О святая мирносице и всехвальная равноапостольная Христова ученице Магдалино Марие! К тебе, яко верней и мощней о нас к Богу ходатаице, мы грешнии и недостойнии ныне усердно прибегаем и в сокрушении сердец наших молимся. Ты в житии твоём страшныя козни бесовския испытала еси, но благодатию Христовою явно от тех свободилася еси. И нас молитвами твоими от сети бесовския избави, да всегда, во всем житии нашем, делом, словом, мыслию и тайными помышленьми сердец наших верно послужим единому святому Владыце, Богу нашему. Ты паче всех благ земных Сладчайшаго Господа Иисуса возлюбила еси и Тому чрез все житие добре последовала еси, божественными учении Его и благодатию душу свою питаючи, и множество человек от тьмы языческа ко Христу чудному свету приводящи. Сия убо ведуще, молим тя: испроси нам у Христа Бога благодать просвещающую и освящающую нас, да ею осеняеми, в вере и благочестии, в подвизех же любви и самоотвержения преуспевати будем, и ближним служити неленостно потщимся, твоего человеколюбия образ памятующе. Ты, о святая Марие, бодренно благодатию Божиею житие на земли претекши, во обители небесныя радуящися отшла еси; моли убо Христа Спаса, да и нас сподобит странствие наше в сей юдоли плача непреткновенно совершити и в мире и покаянии житие наше скончати, да тако во святости на земли поживше, вечныя блаженныя жизни на небеси сподобимся и тамо с тобою и всеми святыми вкупе восхвалим Троицу нераздельную и воспойм единого Божество Отца и Сына и Духа Всесвятаго во веки веков. Аминь.

Молитва 2

О святая мирносице, равноапостольная Магдалино Марие! Ты теплою любовью твоею ко Христу Богу злыя козни вражия попрала еси, и безценный бисер Христа обретши, Царства Небеснаго достигла еси. Сего ради к тебе припадаю умиленною душею, и сокрушенным сердцем вопию ти: призри с высоты небесныя на мя, греховными искушеньми боримаго; виждь, коль многими

грехи и бедами на всяк день враг мя запинает, погібели моёй искій. Тёмже, о сла́вная и всехва́льная учени́це Христо́ва Мари́е, умоли́ возлю́бленнаго тобо́ю и возлю́бившаго тя Христа́ Бо́га, да пода́ст ми оставле́ние мно́гих мо́их прегреше́ний, да укрепі́т мя благода́тию Своёю трэ́звенно и бо́дренно шествовати́ путе́м святы́х Его́ за́поведей и храм Ду́ха Свята́го да соде́лает. Да та́ко многотру́дное жити́е моё на земли́ сконча́в, во све́тлыя и блаже́нныя оби́тели ра́я небе́снаго всели́тися сподо́блюся, иде́же ты со все́ми святы́ми ра́достно славосло́виши единосущную Трои́цу, Отца́ и Сы́на и Ду́ха Всесвята́го, во ве́ки веко́в. Ами́нь.